



Pranuar / Dorezuar Prijmjeno / Prodato Received / Delivery	02 - 02 2024	4	viti god year
Organ /Njësia Organ /Jedinica Org /Unit	Nr Prot Br Prot Prot No	Shtojca Prilog Appendix	Sasia Kolicitna Quantity
SKANSHOK	G71/2024		1/4



Republika e Kosovës  
Republika Kosova - Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS  
NEZAVISNI NADZORNI ODBOR CIVILNE SLUŽBE KOSOVA  
INDEPENDENT OVERSIGHT BOARD FOR THE CIVIL SERVICE OF KOSOVO

A.nr.1544/2023

Këshilli i Pavarur Mbikëqyrës për Shërbimin Civil të Kosovës-Kolegji për Shqyrtimin dhe Vendosjen e Ankesave në përbërje nga: Arben Mehmeti-kryetar, Malsore Gashi-Bajraktari dhe Ardita Haxhnikaj-Demi-anëtarë, me Rushit Kajtazi-Zyrtar i Lartë për Bashkëpunim Profesional në cilësinë e procesmbajtësit. ka shqyrtuar ankesën A.nr.1544/2023, të datës 20.12.2023, të parashtruar nga ankuesi

është çështjen juridike "Kërkesë nga marrëdhënia e punës" përkatësisht kundër Raportit të Komisionit për Vlerësimin e Sistemeve Shtetërore të Informacionit dhe Komunikimin me Rëndësi Strategjike i miratuar sipas Vendimit Nr.23/165 të datës 12.10.2023 të Qeverisë së Kosovës, duke vepruar në pajtim me nenin 6, paragrafin 1, nën paragrafin 1.1 dhe nenin 18, paragrafin 1, nën paragrafin 1.7 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës si dhe në mbështetje të Rregullores Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, më datë 02.02.2024, mori këtë:

V E N D I M

Hedhet poshtë si e parakohshme ankesa me numër A.nr.1544/2023, e datës 20.12.2023, e parashtruar nga ankuesi.

A r s y e t i m

Ankuesi është punësuar sipas Ndryshimit dhe Plotësimit të Akt Emërimit, me numër protokoll Nr.30/2015, të datës 07.04.2015, në pozitën "Udhëheqës i Sektorit të Ndihmës Online dhe Promovimit të -e Qeverisjes" në Agjencinë e Shoqërisë së Informacionit, më datë 20.12.2023 ka parashtruar ankesë me numër protokoll 7572/2023 në Këshillin e Pavarur Mbikëqyrës për Shërbimin Civil, e regjistruar nën shenjën A.nr.1544/2023, kundër Raportit të Komisionit për Vlerësimin e Sistemeve Shtetërore të Informacionit dhe Komunikimin me Rëndësi Strategjike i miratuar sipas Vendimit Nr.23/165 të datës 12.10.2023 të Qeverisë së

Kosovës, lidhur me mos klasifikim në listën e eksperteve sipas shtojcës 14.4 të Ligjit Nr. 08/L-196 për Pagat në Sektorin Publik.

Këshilli i Pavarur Mbikëqyrës për Shërbimin Civil të Kosovës, bazuar në dispozitat e Rregullores Nr.02/2018 për Procedurën e Shqyrtimit dhe Vendosijes së Ankesave, me datë 28.12.2023, ka proceduar kërkesën për përgjigje në ankesë në Komisionin për Vlerësimin e Sistemeve Shtetërore të Informacionit dhe Komunikimit me Rëndësi Strategjike, ndërsa, ky i fundit, me datë 29.12.2024, ka përcjellë përgjigjen në ankesë së bashku me provat materiale lidhur me këtë çështje.

Kolegji për Shqyrtimin dhe Vendosijen e Ankesave, duke shqyrtuar të gjitha shkresat e lëndës të parashtruara nga palët, ka konstatuar se ankesa e ankuesit, është e **parakohshme, sepse:**

Nga administrimi i provave të lëndës rezulton se Qeveria e Republikës së Kosovës, bazuar në dispozitat e Ligjit Nr.08/L-196 për Pagat në Sektorin Publik dhe Rregulloren (QRK) Nr.11/2023 për Ekspertet, me Vendimin Nr.07/132 të datës 08.03.2023, ka themeluar Komisionin për Vlerësimin e Sistemeve Shtetërore të Informacionit dhe Komunikimit me Rëndësi Strategjike, përgjegjës për pranimin e kërkesave të dërguara nga institucionet dhe vlerësimin e tyre, si dhe dërgimin në Qeveri për aprovim të Listës së Eksperteve, të kategorizuar në shtojcën 14.4 të Ligjit Nr.08/L-196 për Pagat në Sektorin Publik. Si rrjedhojë, komisioni përkatës i themeluar nga Qeveria, ka përgatit Raportin e punës, Listën e sistemeve shtetërore të informacionit dhe komunikimeve me rëndësi strategjike dhe Listën e pozitave të Eksperteve sipas Shtojcës 14.4 të Ligjit Nr.08/L-196 për Pagat në Sektorin Publik, të cilat janë miratuar nga Qeveria e Kosovës, me Vendimin Nr.23/165 të datës 12.10.2023.

Kundër Raportit të Komisionit për Vlerësimin e Sistemeve Shtetërore të Informacionit dhe Komunikimit me Rëndësi Strategjike, i miratuar sipas Vendimit Nr.23/165 të datës 12.10.2023 të Qeverisë së Kosovës, ankuesi, me datë 20.12.2023 ka parashtruar ankesë në Këshillin e Pavarur Mbikëqyrës për Shërbimin Civil të Kosovës, me pretendimin ankimor së përmes aktit të kontestuar i janë cenuar të drejtat nga marrëdhënia e punës dhe se është trajtuar në mënyrë të pa drejtë dhe jo të barabartë, pasi që i njëjti mban pozitën e punës "*Udhëheqës i Sektorit të Ndihmës Online dhe Promovimit të - e Qeverisjes*" në Agjencinë e Shoqërisë së Informacionit, dhe se pozita e tij nuk është përfshirë në Listën e pozitave të Eksperteve sipas Shtojcës 14.4 të Ligjit Nr.08/L-196 për Pagat në Sektorin Publik.

Kolegji i Këshillit lidhur me pretendimet ankimore të ankuesit ka analizuar shkresat e lëndës dhe për rrjedhojë ka gjetur se organi përkatës i punësimit, gjegjësisht, Agjencia e Shoqërisë së Informacionit (ASHI), ka propozuar sistemet e saj për tu kategorizuar si Sisteme Shtetërore të Informacionit dhe Komunikimit me Rëndësi Strategjike dhe po ashtu pozitave të punës në kuadër të këtyre sistemeve për tu kategorizuar si ekspert sipas Shtojcës 14.4 të Ligjit Nr.08/L-196 për Pagat në Sektorin Publik, ndërsa Komisioni përkatës i themeluar nga Qeveria, ka njohur si Sisteme Shtetërore të Informacionit dhe Komunikimit me Rëndësi Strategjike, në kuadër të ASHI-së, vetëm këto sisteme: *Sistemin e Informacionit për siguri kibernetike qeveritare; Sistemin e Informacionit në qendrën shtetërore të dhënave; Platforma e Kosova; Platforma e Interoperabilitetit-GG; Sistemi i telefonisë dhe rrjetit kompjuterik shtetëror; Infrastruktura për hosting të aplikacioneve dhe*

*data baza përkatëse e IRK-se në platformën Microsoft; Infrastruktura për hosting të aplikacioneve dhe data baza përkatëse e IRK-se në platformën Open Source; Sistemi elektronik për menaxhimin e pasurisë shtetërore e-Pasuria; Sistemi i Internetit të Komunave (SIK); Sistemi për Menaxhimin dhe Arkivimin Elektronik të Dokumenteve-SMAED; Sistemi i menaxhimit të vijueshmërisë në punë (SMVP); Sistemi elektronik i kartelave identifikuese, dhe rrjedhimisht në kuadër të këtyre sistemeve ka njohur njëzetetë (23) pozita të punës për Ekspert sipas Shtojcës 14.4 të Ligjit Nr.08/L-196 për Pagat në Sektorin Publik.*

Komisioni për Vlerësimin e Sistemeve Shtetërore të Informacionit dhe Komunikimin me Rëndësi Strategjike, në përgjigjën e dhënë si në ankesë, ka njoftuar se me datë 06.12.2023 ka pranuar kërkesë nga Agjencia e Shoqërisë së Informacionit, për rishikim të listës së pozitave të ekspertëve dhe se shqyrtimi i kërkesave për rivlerësim është duke vazhduar.

Andaj, duke marr parasysh faktin se organi i punësimit, gjegjësisht, Agjencia e Shoqërisë së Informacionit, me datë 06.12.2023 ka parashtruar kërkesë për rishikim të listës së pozitave të ekspertëve tek Komisioni për Vlerësimin e Sistemeve Shtetërore të Informacionit dhe Komunikimin me Rëndësi Strategjike, Kolegji i Këshillit konstaton se ankesa e ankuesit e parashtruar me datë 20.12.2023 në Këshillin e Pavarur Mbikëqyrës për Shërbimin Civil të Kosovës, ende pa kaluar afati për vendosje në raport me kërkesën e datës 06.12.2023 është e parakohshme në kuptim të dispozitave të Ligjit Nr. 05/L-031 për Procedurën e Përgjithshme Administrative, përkatësisht nenit 98 paragrafi 1 dhe 2 ku përcaktohet se: 1. *Procedura administrative nisur sipas kërkesës, do të përfundojë sa më shpejt që të jetë e mundur, por jo më vonë se sa afati i përcaktuar me ligj të veçantë për atë lloj procedure.* 2. *Në rast se ligji i veçantë nuk ka paraparë një afat, siç është paraparë në paragrafin 1 të këtij neni, afati i përgjithshëm i zbatueshëm për përfundimin e procedurës administrative është dyzetepesë (45) ditë nga fillimi i saj, ngase nuk ka kaluar afati i përcaktuar prej 45 ditësh nga dita e parashtrimt të kërkesës për rishqyrtim nga organi përkatës i punësimit, dhe si e tillë ankesa vlerësohet e papranueshme në kuptim të nenit 127 paragrafi 4 ndërlidhur me nenin 129 paragrafi 1 nën paragrafi 1.3 të Ligjit Nr. 05/L-031 për Procedurën e Përgjithshme Administrative.*

Kështu që për sa me sipër e duke u bazuar në nenin 18 paragrafin 1 nën paragrafin 1.7 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Kolegji i Këshillit vendosi si në dispozitiv të këtij Vendimi.

**Këshillë juridike:** Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë-Departamenti për Çështje Administrative, brenda afatit prej tridhjetë (30) ditësh, nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS  
Lënda, A.nr.1544/2023, datë 02/02/2024

~~Rushit KAJTAZI~~

Zyrtar i Lartë për Bashkëpunim Profesional

~~Arben MEHMETI~~

Kryetar i Kolegjit



Vendimi i dorëzohet:

- Ankuesit
- Komisionit për Vlerësimin e Sistemeve Shtetërore të Informacionit dhe Komunikimit më Rëndësi Strategjike/Qeveria e Kosovës;
- Udhëheqësit të Njesisë së Burimeve Njerëzore në Agjencinë e Shoqërisë së Informacionit; dhe
- Arkivit të KPMSHCK -së.

